

上清大洞真经卷之四

- [皇初紫灵元君道经第十七](#)
- [无英中真上老君道经第十八](#)
- [中央黄老君道经第十九](#)
- [青精上真内景君道经第二十](#)
- [太阳九炁玉贤元君道经第二十一](#)
- [太初九素金华景元君道经第二十二](#)
- [九皇上真司命道君道经第二十三](#)
- [太皇上真玉华三元君道经第二十四](#)

皇初紫灵元君道经第十七

“皇初紫灵元君道经第十七

上清大洞真经卷之四

茅山上清三十八代宗师蒋宗瑛校勘

精血三真章

谨请精血三真元生君，字黄宁子玄，常守兆鼻两孔之下源死炁之门，使兆精神宣畅于百节，血液盈满于千关，万灵之炁辅护，太一之魂保身。

真思精血中三真元生君真炁，赤云之色，罩于顶上，乃默呪曰：

三真焕光，流丹徘徊，离合九景，玉洞金扉，上招朱皇，五苦廓开，死根断落，日魂同飞，超逸十界，上升玉阶。



次思赤炁从兆泥丸中入，兆乃口吸神云，咽津三过，结作三神，赤衣冠，下布绛官，入两膀胱，运下元精血缠绕神身，入尾闾穴，穿骨髓，上入泥丸，下布鼻凹，出赤血化为一轮赤光，神在光内，前去身五丈，顺时吐息。

诵玉经。

大洞玉经曰

皇初炁紫元色中，晖光郁霄明，三天焕九景，离合亿万生，披朱巾绿霞，上回寒童灵月名，拔出五苦毒，超身过始青东方天，白素启萧办右元君名，金门卫朱兵，七世积尸结，一化百散倾，受福东霞室，反胎朱火庭。

上清紫元王祝曰

七炁混合，帝一徊元，结滞月散，兆命长迁，死道门灭，断绝胞根，五藏生华，六府金鲜，帝一保形，司命保神，五符启扉，五籍登仙，世为道王，帝师缠绵，散香龙窗，反华扬烟，七携无上，八晖九陈，流源回液，领会六渊元君宫名，名书上清，炁积寂轩，徊风脱死，帝一相连，五通七合，俱生上元。


毕，乃口微祝曰：

天上内音，发迁合，光运长。

地上外音，常生天，入宝炁。

大洞精血三真元生君消魔玉符

诀曰：当朱书黄缙，佩之，存呼元生君内讳名字，镇我鼻孔之下，为我通太真之户，固死炁于九门。乃叩齿三通，咽液三过。



无英中真上老君道经第十八

“无英中真上老君道经第十八

上清大洞真经卷之四

茅山上清三十八代宗师蒋宗瑛校勘

胃脘二真章

谨请胃脘二真坚玉君，字凝羽珠，常守兆太仓之腑五肠之口死炁之门，使黄庭香洁，三尸灭绝，中元之炁常满，帝皇之光郁郁，上冲泥丸，敷散骨节。

真思胃脘中二真坚玉君真炁，碧云之色，罩于顶上，乃默呪曰：

二真固神，郁勃三关，徊金合玉，坚备泥丸，上通帝炁，布流金门，混化启明，合我仙魂，七祖同飞，灭绝胞根，世保道德，永享欣欣。



次思碧炁从兆泥丸中入，兆乃口吸神云，咽津二过，结作二神，状如二帝，青衣冠，下布太仓之腑，五肠之口，神面相向立，顺时吐息。

诵玉经。

太洞玉经曰

无英神名真上玄，玄炁神名元素炁，寄频斗中太一携运珠心神，混化启明日，正一左右仙人中神，长挟林虚神名室，兆有五符籍，合仙得真契，魂生太无中，魄亦五道会，世世解死尸，七祖无住滞，神风吹胞树，根叶已断绝，胞中种鬼殃，五符开地结，长为神真王，应仙续万世。

高上神霄玉清王祝曰

魂生炁中，布在九重，道出三极，常游绛宫，三宫合化，是为紫房，紫房所在，先由明堂眉间一中，明堂之内，守神桃康神名，风云郁郁，既清且凉，塞闭欲孔，割破恋根，其圣曰（可）大道君名，其真曰炁，兆能知之，乃开金门，

金门左右，忽见高贤，左曰父宁在帝一名，右曰母精延帝一字，此是景中伯，与尔登玉晨，父宁母精，世世为仙，万条重华，皆受帝恩。


毕，乃口微祝曰：

天上内音，弥劫连，大生章。

地上外音，反老童，受年祚。

大洞胃脘二真坚玉君消魔玉符

诀曰：当朱书黄缙，佩之，存呼坚玉君内讳名字，镇我太仓之腑，使兆黄庭保固，死炁灭绝，内胎含秀，长对神室。乃叩齿三通，咽液二过。



中央黄老君道经第十九

“中央黄老君道经第十九

上清大洞真经卷之四

茅山上清三十八代宗师蒋宗瑛校勘

心中一真章

谨请心中一真天精液君，字飞生上英，常守兆胸中，四极之口死炁之门，使兆五藏生华光，四关受真炁，紫液流满于胸中，百神结成于绛宫，羽衣虎裙，上升玉天。

真思心中一真天精液君真炁，绛宫之色，罩于顶上，默祝曰：

一真镇心，总领百神，百神常生，会我绛轩，上招玉光，六液沉珍，赤景启灵，拔我七根，超逸三涂，上升南仙。



次思绛云从兆泥丸中入，兆乃口吸神云，咽津三过，结作一神，状如帝王，朱衣冠，下布胸间四极之口，化为一轮百宝神光，神在光内，顺时吐息。

诵玉经。

大洞玉经曰

中央黄老君黄素炁，圆华宫名玉寿灵山名，太张上黄素字玉门，伏云三办明三素字，赤景翳逸寥月中夫人名，扬辉中女名太一精，帝女抱定陵斗中中玄字，吟咏玉清经，五籍编紫房，五符入圆庭，七祖反胎宅，灭绝三涂生，流风断血滞，玄叶得黄宁。

高上神霄玉清王祝曰

帝一徊风，化合桃康，流生起福，上溢玉堂，混而合之，出入帝房，三五三真五老合一，必成仙王，七玄父母，灭尸散冤，万劫千重，皆登上仙，曲节伏扈，广敷郁申，守我形者，司命丈人，帝君九炁君公子肝中，深固泥洹，太微玉帝玉华，羽服扬旛，魂魄长相抱，百骨皆满神，神王生津上，超越度死门，遂友高上子玉帝称，挹侍玉清宾。


毕，乃口微祝曰：

天上内音，满景生，比孝通。

地上外音，解脱灾，福劫元。

大洞心中一真天精液君消魔玉符

诀曰：当朱书黄缙，佩之，存呼天精液君内讳名字，镇我胸中四极之口，使神安室宅，死炁消魔，五藏光华，百神宁和。乃叩齿九通，咽液九过。



青精上真内景君道经第二十

“青精上真内景君道经第二十

上清大洞真经卷之四

茅山上清三十八代宗师蒋宗瑛校勘

九元之真章

谨请九元之真男，名拘制，字三阳，常守兆左耳之下，伏晨之户死炁之门，使兆天聪发彻，幽谷鲜明，真炁云行，往来泥丸。

真思九元之真拘制真炁，五色之云，罩于顶上，乃默呪曰：

九元之精，天关开聪，八景合炁，上通金房，三元帝室，反老生翁，玉华灌溉，炼改芝容，飞霄紫舆，运我升空。



次思五色云炁从兆泥丸中入，兆乃口吸神云，咽津三过，结作三神，状如神将，身披金甲，各执兵杖，下布绛官，入左膀胱，穿尾闾穴，入脊髓，上过第一椎耳后，过入左耳之下伏晨之户，神去身五丈，顺时吐息。

诵玉经。

大洞玉经曰

青精官名上华室名炁，太微玄景童内景君，神化玉室内，飞羽车名逸紫山名空，日为三衿交太微别名，奉符登帝墟，开关三关把金节，闭户叩琼钟，灭魔三酆肾官野，招灵上清宫，明出穷关下关阴，入精六合房眉后，回光变皓彩，还白反婴蒙。

玉清内景王祝曰

寂寂上伯心神，接方左手神生盈右手神，心中之神，号曰天精元精演君，流焕九宫，飞生上英，拔绝死门，福臻锵锵，七世父母，结解吉昌，符籍登晨堂名，身并桃康，长保金晖，道德仙王，太微小童，常在帝前，其名景精，其姓曰干，合形太一，被服朱丹，五符命籍，把持玉案，帝君所临，主通诸神，混合太一，司命丈人，固保灵户，五藏会分，帝先

守宅，凶种灭根，三炁郁敷，八回五烟，我得升霄，驾龙明轩。


毕，乃口微祝曰：

天上内音，种炁会，出兰蒙。

地上外音，昌田子，东寿王。

大洞九元之真男拘制消魔玉符

诀曰：当青书黄缯，佩之，存呼九元内纬名字，镇我左耳之下，使兆聪明八达，寤响万里，太真保生，震灵镇死。乃叩齿十二通，咽液十二过。



太阳九炁玉贤元君道经第二十一

“ 太阳九炁玉贤元君道经第二十一

上清大洞真经卷之四

茅山上清三十八代宗师蒋宗瑛校勘

皇一之魂章

谨请皇一之魂女，名上归，字帝子，常守兆右耳之下，伏晨之户死炁之门，使兆幽明之光，上朗泥丸，太元之音，独乐一身，弹金鸣钟，流彻太和。

真思皇一之魂上归真炁，玄云之色，罩于顶上，乃默呪曰：

皇一上真，洞生丹房，朱婴荣曜，发溢明光，太元之音，朗彻九空，玄金独乐，振响琅琅，上招玉景，协我神堂，策虚升飞，游宴玉京。



次思玄云之炁从兆泥丸中入，兆乃口吸神云，咽津三过，结作三神，状如神将，身披金甲，各执兵杖，下布绛官，入右膀胱，穿尾闾穴，上入脊髓，上过第一椎耳后，过入右耳之下，伏晨之户，神去身五丈，顺时吐息。

诵玉经。

大洞玉经曰

太阳化三神，紫輶微玄日神名下，元君保谷童胃神，守胃塞鬼户，金符焕北华，玉契拔七祖，帝真观上生精魂字，断我三涂苦，司命血中君摄生，太一胎中君营神，开阴太漠，长保阳源，素明童子肺中神，正我三魂，列篆玉清，羽书紫玄，月帝夫人，运翹结贤，奉符六合，混会亿千，累为仙王，上宴九天。

玉清太素元景王祝曰

九宫一合，化形帝晨，上升紫房，命真召仙，会济魂魄，领括百神，七玄康乐，拔苦破根，死焰灭炁，福禄充轩，兆登太霄，驾景控云，日中五帝，挟日精轮，郁将日帝名逸阜，飚景同迁。


毕，乃口微祝曰：

天上内音，会命初，幽中和。

地上外音，混生宗，理仙枢。

太洞皇一之魂上归消魔玉符

诀曰：当黄书青缙，佩之，存呼皇一内讳名字，镇我右耳之下，使我万炁通畅，玉清开生，死炁镇塞，九孔受灵。乃叩齿十二通，咽液十二过。



太初九素金华景元君道经第二十二

“太初九素金华景元君道经第二十二

上清大洞真经卷之四

茅山上清三十八代宗师蒋宗瑛校勘

紫素左元君章

谨请紫素左元君翳郁无办，字安来上，常守兆头面之境，使万邪不侵，干精尽灭，紫炁充于泥丸，太素镇于鼻孔，景云披于口齿，玉林聚于发肤，散七世之积尸，解七祖之罪仇，上生天帝堂，反真更受胎。

真思紫素左元君翳郁无办真炁，景云之色，罩于顶上，乃默呪曰：

翳郁生真，炁真生空，灵光昱昱，紫素融融，上致流津，下布我宫，身生水火，体变玉光，飞仙羽盖，升入神公，受书玉京，成我仙宗。



次思景云之炁从兆泥丸中入，兆乃口吸神云，咽津三过，结作一神，状如帝王，下入绛宫，穿尾闾穴，上入泥丸，下布玄达之户，存神吐万道景霞之云，罩于头面之境，顺时吐息。

诵玉经。

大洞玉经曰

太初天名九素炁，炁出华景宫名中，法坦斗中太一名舞仙旗，逡巡五老翁，夫人名启朱斗中夫人，执籍归紫房，元父左回明元父字，混会太微童。

高上左晨玉清王祝曰

庆元吉津，流汨西田，大帝携手，命召高仙，披散积秽，断绝死根，上一天帝，号玄凝天上一赤子名，曜明六合，静寂泥丸，是为伯无上神名，使兆保长安，列图玉皇，并襟帝晨，五府生华，六液龙源，渊清太素，郁葜金津，万仙来朝，五岳启陈，玄炁沉散，天福奏烟，雕梁青帝名守命户，长来护死门，上生玉房，受位金仙，天之玉堂，常接帝贤，九天

之中，宴盼劫年。


毕，乃口微祝曰：

天上内音，冥冲次，信明都。

地上外音，延命玉，驾本根。

大洞紫素左元君消魔玉符

诀曰：当黄书青缙，佩之，存呼左元君内讳名字，镇我头面之境，使兆五藏生真，玉华玄映，保固三炁，神欢灵畅。乃叩齿九通，咽液九过。



九皇上真司命道君道经第二十三

“九皇上真司命道君道经第二十三

上清大洞真经卷之四

茅山上清三十八代宗师蒋宗瑛校勘

黄素中元君章

谨请黄素中元君圆华黄办，字太张上，常守兆胸腹之境，使鬼魔伏制，三尸灭形，黄云散于肢体，金液充于太仓，晨景之晖上华，太真之炁运光，俾七祖父母，释罪而受胎，更生于南宫。

真思黄素中元君圆华黄办真炁，晨景之色，罩于顶上，乃默呪曰：

九天上景，化生华晖，晃曜太空，曜真紫微，上致中皇，百神降回，散根离苦，八难豁开，七祖同升，福庆巍巍，使我神仙，八景齐飞。



次思景晖之炁从兆泥丸中入，兆乃口吸神云，咽津二过，结作二神，状如神将，身披金甲，下布庚辛之位，化为两轮黄光，神在光内顺时吐息。

诵玉经。

大洞玉经曰

九皇斗真上真炁，四司四司命太仙宫，飞霞天上山名散天日，丽焕六合房，上真朝玉清，乘景晨晖中，五神号发纽司命名，捧籍启虚皇，逸策登紫清，金符刻羽宫。

高上神霄玉清王祝曰

大帝精魂，阳堂八灵，披散四炁，混合众生，帝一九真尊名承图，三元会明，九真安安，七神宁宁，超越滞节，过度鬼兵，上升帝晨，盼乐玉庭，玄母定策，五符开清，胞根灭种，血秽殄平，七祖父母，超诣三清，无英明夫无英别名，掌我仙经，广神天记帝名安炁，绿回九关魂名绝冥，闭藏死关，太一混生，长寝羽台上，固神五老室，受策上清阙，保德

七元日，上上登玉霄，下下合帝一。


毕，乃口微祝曰：

天上内音，掌堂逮，元眇灵。

地上外音，大劫回，末始交。

大洞黄素中元君消魔玉符

诀曰：当朱书青缙，佩之，存呼中元君内讳名字，镇我胸腹之境，使死炁绝灭，五内生真，七祖腾飞，更受胎仙，神安炁朗，超登帝晨。乃叩齿三通，咽液三过。



太皇上真玉华三元君道经第二十四

“太皇上真玉华三元君道经第二十四

上清大洞真经卷之四

茅山上清三十八代宗师蒋宗瑛校勘

白素右元君章

谨请白素右元君启明萧办，字金门上，常守兆下关之境，从小腹至脚底，使三积之宿秽无滞，地户之土鬼沉灭，明玉之液，上淘于极阴之宫，素金之炁，逆冲于两腕之内，髀受九灵之润，脚生重玄之云，累祖解于冥罪，七世散于旼根，更生南宫，上宴帝轩。

真思白素右元君启明萧办真炁，月光玄云之色，罩于顶上，乃默呪曰：

白素启明，九天同生，高虚素籥，浮景玉清，回真曲仙，流洒八溟，通幽达微，朗耀华精，使我内彻，五孔开明，神公来游，我道克成。



次思月华之炁从兆泥丸中入，兆乃口吸神云，咽津六过，结作六神，状如力士，下入绛宫，穿小腹二欲孔，两膀胱，下布下关之境，至两脚心出去，身五丈，乘玄云，顺时吐息。

诵玉经。

大洞玉经曰

天皇上真炁，三元乘神回，法坦兴朱霄，帝昌泥丸神名启玉扉，拔尸命门内，解结桃康阶，敛神保五籍，越转入太微，三五混一，六液精合平，公子无英奉符，司命心神保生，紫房洞耀，泥丸安宁，百关备仙，五华飞冥，云飙流逸，八景浮清，并羽大帝，携带寒庭月中，沉殃天津，绝灭胞茎，七世累玄，解结南庭朱陵。

太微玉清帝君祝曰

魂生九炁，炁变成神，五老缠会，太一化仙，二十四真，徊形帝先，九曲下户，镇生白云，黄庭六府，含养命根，胎结

胞树，种栽死山，一得拘制，受断灭源，符籍清明，金映玉轩，长为德伯，世得道恩，升登日月，遂友帝先。

毕，乃口微祝曰：

天上内音，保解乘，结六庭。

地上外音，生双门，入仙胎。

大洞白素右元君消魔玉符

诀曰：当青书黄缙，佩之，存呼右元君内讳名字，镇我下关之境，使三真固魂，九灵制魄，万神总归，安镇室宅，七祖解散，名言仙籍。乃叩齿三通，咽液三过。

